

讀書叢錄

序

余受性椎魯寡所嗜慕少年讀書里中藏書之家借覽無虛日及壯遨遊吳越來往燕齊謁通德之門窺禮堂之與左右采獲漸成撰述五十以後始抵粵東一官匏繫非吾所好趨走之暇閉門却掃於是重取經史百家朝研夕稽證其異同辨其得失以聲音文字通其原以轉寫譌舛窮其變勿敢嚮壁虛造勿敢勦襲陳言淺見眇聞聊以自適後之覽者其或諒斯道光元年十二月廿一日臨海洪頤煊識

案先生字筠軒与兄坤煊弟震煊皆以績學稱而先生尤博綜羣籍名

大最顯受知阮文達公以嘉慶辛卯拔貢就銓州判雲次廣東德塘

歿所著尚有宮室答問等書咸豐辛卯上元日鄉後學會稽李慈  
銘長孺甫識于都門易舍

又案先生此書僅徵相國已最其說經者刻入學海堂經解中其  
他如禮經宮室答問二卷孔子三朝記注二卷及諸經精舍文集所載  
禹貢北過降水至于大陸故禹都陽城考曾氏一貫論釋魯郊七  
經孟子攷文補遺跋諸篇皆博稽精核卓然可傳宸極字百里拔  
貢生與先生同佐儀徵編經籍卷諸著有夏小正疏義四卷及諸經精  
舍文集所載禹貢北過降水至于大陸故論語過位解孔子去魯證頑  
民後神禘曾氏一貫論中庸說性情說格物說夏小正疏義是說鞠則  
見解漢儒師宗法攷六朝經術派流論共十二篇皆見學海堂經解精  
奧不讓其七也中泰望後一日范客又託時館商城相國家

讀書叢錄總目

咸豐十三年春正月十日以京錢七千購于版科

卷一

易 尙書

卷二

周書 毛詩

卷三

周禮 儀禮

卷四

禮記 大戴禮

卷五

春秋左氏傳

卷六

國語 公羊傳 穀梁傳

卷七

論語 孝經 孟子

卷八

爾雅 經總類

卷九

方言 說文

卷十

小爾雅 釋名 廣雅 字林

卷十一

玉篇 文選注 一切經音義

卷十二

五經文字 九經字樣 廣韻 汗簡

鐘鼎款識 續鐘鼎款識

卷十三

老子 晏子春秋 孫子 墨子 鄧析子

卷十四

列子 莊子 公孫龍子 慎子 鶡冠子

韓非子

卷十五

荀子 呂氏春秋 賈誼新書

卷十六

淮南子

鹽鐵論

法言

白虎通

卷十七

史記

卷十八

史記

卷十九

漢書

卷二十

漢書

卷二十一

漢書

卷二十二

後漢書

卷二十三

後漢書

卷二十四

宋元刊本

男瞻墉校字



道  
光  
二  
年  
正  
月  
初  
吉  
廣  
東  
省  
城  
西  
湖  
街  
富  
文  
齋  
刊  
行

讀書叢錄卷一

臨海洪頤煊

王弼易注

隋書經籍志周易十卷魏尚書郎王弼注六十四卦  
六卷韓康伯注繫辭以下三卷王弼又撰易畧例一  
卷釋文序錄亦云王輔嗣止注大經講者相承用韓  
注以下續之頤煊案南齊書陸澄傳時國學置鄭王  
易澄謂尚書令王儉曰弼於注經中已舉繫辭故不  
復別注今若專取弼易則繫說無注是其時尚未以  
韓注續也

經分上下篇

易緯乾鑿度陽道純而奇故上篇三十所以象陽陰  
道不純而偶故下篇三十四所以法陰頤煊案陽象  
天道故以乾坤天地爲始以坎離日月爲用陰法人  
事故以咸恒男女爲始以既未濟水火爲用天道有  
屯亨故以泰否居中人事有得失故以損益居中

文王作爻辭

釋文序錄宓犧氏始畫八卦因而重之爲六十四文  
王拘於羑里作卦辭周公作爻辭頤煊案三國志管  
輅傳上追文王六爻之旨下思尼父彖象之義此以  
爻辭亦文王作

卽鹿

屯六三卽鹿无虞釋文王肅作麓云山足頤煊案風俗通山澤篇麓山足也詩云瞻彼旱麓易稱卽麓无虞虞翻曰艮爲山山足稱麓本皆作麓

童蒙來求我

蒙彖匪我求童蒙童蒙求我釋文一本作來求我惠氏棟周易古義引呂氏春秋勸學篇高誘注易曰匪我求童蒙童蒙來求我以證經文本有來字王氏引之經義述聞又據王弼注蔡邕處士圈叔則碑謂漢魏時經文皆有來字頤煊案華嚴經音義易稱蒙卦者謂童蒙來求我非我求童蒙求上亦當有來字

貞丈人

師貞丈人吉釋文貞丈人絕句頤煊案說文貞卜問也周禮天府鄭注鄭司農云貞問也易曰師貞丈人吉問于丈人大卜鄭注貞之爲問問於正者必先正之乃後問焉易曰師貞丈人吉貞又通作偵禮記緇衣易曰恆其德偵鄭注偵問也

### 輿尸

六三師或輿尸王注以陰處陽以柔乘剛進則无應退无所守以此用師宜獲輿尸之凶頤煊案周禮夏官輿司馬鄭注輿衆也左氏成二年傳無令輿師淹於君地杜預注輿衆也爾雅釋詁尸主也謂或以衆人主師則无功故凶

尙德載

小畜上九尙德載阮尙書校勘記古本載上有積字  
頤煊案王注體巽處上剛不敢犯尙德者也爲陰之  
長能畜剛健德積載者也注本有積字虞翻曰坎雲  
復天坎爲車積載在坎上故上得積載亦當有積字  
匪其彭

大有九四匪其彭釋文子夏作旁頤煊案王注旁謂  
三也王弼本亦作旁釋名釋兵篇彭排彭旁也在旁  
排敵攻禦也邢昺爾雅疏今謂之旁牌墨子備城門  
篇若彭有水濁非常者必穴土也彭卽旁字

朋盍簪

豫九四朋盍簪釋文徐側林反子夏傳同疾也鄭云  
速也惠氏周易古義子夏鄭玄張揖王弼皆訓簪爲  
疾或云速明非簪字頤煊案釋名釋首飾篇簪𦏧也  
以𦏧連冠於髮也說文簪作先𦏧替替銳意也皆與  
疾速義相近

### 貫魚

剝六五貫魚以宮人寵王注貫魚謂此衆陰也駢頭  
相次似衆陰也頤煊案考工記梓人鄭注連行魚屬  
賈疏魚唯唯行相隨故謂之連卽此貫字之義

### 口實

頤自求口實山井鼎周易考文作自求口食頤煊案

鄭注坤載養物而人所食之物存焉觀其求可食之物則貪廉之情可別也鄭本作食

### 朶頤

初九觀我朶頤王注朶頤者嚼也正義朶是動義如手之捉物謂之朶也頤煊案朶頤卽染頤說文染从水朶聲徐鍇曰說文無朶字朶爲朶字之譌朶卽染字之省釋文朶京作揣揣當是濡字之譌儀禮公食大夫禮以辯濡於醢鄭注濡猶染也卽其證

### 士夫

大過九五老婦得其士夫頤煊案荀子非相篇婦人莫不願得以爲夫處女莫不願得以爲士楊倞注士



者未取妻之稱易曰老婦得其士夫

### 麗乎土

離彖百穀草木麗乎土釋文王肅本作地頤煊案初學記卷二一切經音義卷六引易皆作麗於地說文麗字注引易曰百穀草木麗於土宋本說文作麗於地皆同王肅本

### 咸其輔頰舌

咸上六咸其輔頰舌釋文孟作俠頤煊案說文輔頰也廣雅輔謂之頰輔頰同物不應連名當從孟喜作俠淮南說山訓高誘注俠輕也俠舌謂輕言與下滕口說義正相應

肥遯

遯上九肥遯无不利頤煊案後漢書張衡傳利飛遁以保名李賢注淮南九師道訓曰遁而能飛吉孰大焉王注憂患不能累矰繳不能及是以肥遯无不利字亦當作飛

不詳也

大壯上六象不能退不能遂不詳也釋文詳審也鄭王肅作祥善也頤煊案正義祥者善也進退不定非爲善也故云不祥也正義本作祥虞翻曰乾善爲祥不得三應故不祥也本亦作祥

箕子之明夷

明夷六五箕子之明夷釋文蜀才箕作其頤煊案王注最近於晦與難爲比險莫如茲而在斯中猶闇不能沒明不可息注亦以箕爲其讀子爲茲正義箕子之明夷者六五最比闇君似箕子之近殷紂非注義若濡有愠

夬九三獨行遇雨若濡有愠无咎王注若不與衆陽爲羣而獨行殊志應於小人則受其困焉遇雨若濡有恨而無所咎也頤煊案愠當作緼禮記玉藻緼爲袍鄭注緼謂今續及舊絮也言遇雨若濡有緼絮可以禦溼故无咎旣濟緼有衣袽王注緼宜曰濡衣袽所以塞舟漏也袽以塞舟漏緼以禦雨其義同也

金梃

姤初六繫于金梃釋文說文作榆云絡絲跌也讀若  
昵王肅作梃從手頤煊案說文屎簍柄也重文作梃  
方言簍櫜也郭璞注所以絡絲櫜梃本一物正義云  
王肅之徒皆爲織績之器婦人所用手字亦當作梃釋  
文云從手作梃者譌也太平御覽卷八百二十五引  
易作梃卽陸德明所見王肅本

以杞包瓜

九五以杞包瓜正義子夏傳作杞匏瓜薛虞記云杞  
性柔刃宜屈撓似匏瓜頤煊案王注包瓜爲物繫而  
不食者也正義匏瓜爲物繫而不食則注疏本皆作

以杞匏瓜

其形渥

鼎九四其形渥頤煊案周禮司烜氏鄭注屋讀如其刑剗之剗漢書敘傳底剗鼎臣服虔曰周禮有屋誅誅大臣於屋下不露也易曰鼎折足其形渥凶字當從鄭本作其刑剗虞翻曰渥大形也亦當與服鄭本同

女歸吉也

漸彖女歸吉也釋文王肅本作女歸吉利貞頤煊案下文進得位往有功也是釋利字進以正可以正邦也是釋貞字其位剛得中也止而巽動不窮也是申

釋進得位二句之義據文義當有利貞二字

自藏也

豐上六象自藏也釋文衆家作戕馬王肅云殘也頤  
煊案淮南說林訓高鳥盡而良弓藏高誘注藏猶殘  
也

用拯馬壯吉

渙初六用拯馬壯吉山井鼎考文古本吉下有悔亡  
二字頤煊案虞翻曰坎爲馬初失位正動體大壯得  
位故拯馬壯吉悔亡之矣虞本吉下有悔亡二字

鬼方

既濟九三高宗伐鬼方惠氏周易古義商時鬼方周

時荆楚之地引汲郡古文武丁三十二年伐鬼方次  
于荆三十四年王師克鬼方氏羌來賓爲證頤煊案  
鬼方不止荆楚之地當連西戎言之後漢書章帝紀  
克伐鬼方開通西域西羌傳武丁征西戎鬼方三年  
乃克故其詩曰自彼氐羌莫敢不來王文選趙充國  
頌李善注鬼方於漢則先零戎也

### 幽明

繫辭上是故知幽明之故原始反終故知死生之說  
韓注幽明者有形无形之象頤煊案淮南原道訓幽  
兮冥兮應無形兮漢書楚元王傳則幽冥而莫知其  
原師古曰幽冥猶暗昧也幽明卽幽冥本亦作窈冥

老子道經窈兮冥兮其中有精莊子在宥篇至道之精窈窈冥冥素問從容論吾問子窈冥王弼注窈冥謂不可見者窈本又作杳皆同聲通用字

旁行而不流

旁行而不流頤煊案此五字當在與天地相似句下與天地相似旁行而不流故不違知周乎萬物而道濟天下故不過樂天知命故不憂安土敦乎仁故能愛文義皆相對旁並也史記旁河旁海字皆作並旁行而不流禮記中庸所謂道並行而不相悖也

故君子之道鮮矣

故君子之道鮮矣釋文鮮師說云盡也頤煊案詩瓠



葉有兎斯首鄭箋斯白也今俗語斯白之字作鮮齊魯之間聲近斯爾雅釋詁鮮善也釋文本或作誓沈云古斯字詩皇矣王赫斯怒鄭箋斯盡也故師說從之

莫大乎蓍龜

莫大乎蓍龜釋文莫善本亦作莫大盧氏文昭疏證漢書藝文志白虎通蓍龜篇何休公羊注賈氏儀禮疏皆作莫善頤煊案虞翻曰離爲龜乾爲蓍月生震初故成天下之亹亹者莫善蓍龜也本亦作善

何以守位曰仁

繫辭下何以守位曰仁釋文曰人王肅卞伯玉桓玄

明僧紹作仁頤煊案漢書食貨志後漢書蔡邕傳引  
皆作仁文選張平子東京賦守位以仁薛綜作人禮  
記禮運鄭注何以守位曰仁釋文本亦作人

### 蒼簣

說卦震爲蒼簣竹釋文簣或作琅通頤煊案藝文類  
聚卷八十九初學記卷十引易曰震爲蒼琅竹蒼琅  
言其竹色之青似琅玕漢書五行志木門倉琅根師  
古曰銅色青故曰倉琅說文無簣字

### 爲白

巽爲白正義爲白取其風吹去塵故絜白也頤煊案  
白卽帛字賁六五束帛戔戔虞翻曰巽爲帛爲繩是

虞氏易作爲帛也詩六月白旆央央孫炎爾雅注作帛旆央央禮記玉藻大帛不綷鄭注帛當爲白聲之誤也白帛古字通用

### 百兩篇尙書

漢書儒林傳世所傳百兩篇者出東萊張霸分析合二十九篇以爲數十又采左氏傳書序爲作首尾凡百二篇篇或數簡文意淺陋頤煊案論衡感類篇伊尹死時天何以不爲雷雨應曰以百兩篇曰伊尹死大霧三日正義引尙書緯孔子求書得黃帝立孫帝魁之書定可爲世法者百二十篇以百二篇爲尙書十八篇爲中候其說皆本於張霸

古文官書

隋書經籍志古文官書一卷後漢衛敬仲撰史記儒林列傳正義漢書儒林傳師古注俱引作衛宏詔定古文尙書頤煊案衛宏從杜林學林前於西州得漆書古文尙書一卷韓愈科斗書後云李服之者陽冰子授予以其家科斗書孝經衛宏官書兩部合一卷官書卽漆書以其詔定故亦稱官書新唐書藝文志作衛宏古文字書者誤也說文勸字注引衛宏說史記五帝本紀集解引衛宏云摯立九年而唐侯德盛因禪位焉皆古文尙書說

尙書逸篇

禮記坊記正義鄭不見古文尙書漢時別有尙書逸  
篇四月太子發上祭于畢以下三篇之事頤煊案此  
今文泰誓之辭泰誓後得故正義以爲逸篇隋書經  
籍志有尙書逸篇二卷太平御覽卷七十引尙書逸  
篇堯子丹朱不肖舜使居丹淵故曰丹朱卷五百三  
十一引尙書逸篇嗚呼七世之廟可以觀德卷五百  
三十二引尙書逸篇太社唯松東社唯栢南社唯梓  
西社唯栗北社唯槐天子社廣五丈諸侯半之皆是  
曰若稽古

堯典曰若稽古帝堯惠氏棟尙書古義鄭康成曰稽  
同古天也言能順天而行與之同功孔安國曰若順

稽攷也能順攷古道而行之者帝堯此說本賈侍中  
引高貴鄉公幸太學命講尙書鄭立王肅二義頤煊  
案史記三王世家朕承祖考維稽古稽先生解曰維  
者度也念也稽者當也當順古之道也此卽賈馬及  
王肅所本周書周祝解天爲古虞氏易天爲古詩立  
鳥古帝命武湯鄭箋古帝天也後漢書李固傳臣聞  
君不稽古無以承天皆同鄭說

放勳欽明

曰放勳欽明文思安安傳言堯放上世之功化而以  
敬明文思之四德安天下之當安者頤煊案傳以欽  
明文思爲四德本於馬融注見釋文後漢書馮衍傳

李賢注尙書考靈耀曰放勳欽明文思晏晏文選魯  
靈光殿賦張載注尙書曰放勳欽明四字皆作一句  
讀

嵎夷

宅嵎夷釋文馬云嵎海隅也夷萊夷也顧煊案說文  
土部嵎夷在冀州陽谷立春日日值之而出尙書曰  
宅嵎夷此古文說也山部嵎山在遼西一曰嵎鐵嵎  
谷也此今文說也史記夏本紀索隱今文尙書及帝  
命驗並作禺鍤鍤古鐵字遼西地禹貢時屬冀州周  
禮職方屬幽州馬融注以青州嵎夷當之非是

南交

宅南交傳南交言夏與春交舉一隅以見之正義經  
冬言幽都夏當云明都鄭云夏不言曰明都三字摩  
滅也頤煊案宅嵎夷曰陽谷是一地二名宅西宅朔  
方統言之必實舉其地所在曰昧谷曰幽都宅南交  
謂居南方交趾之地文義已著不必有曰明都三字

### 舜典

舜典王氏鳴盛尙書後案孔壁所得古文本有此篇  
後其篇亡佚撰僞古文者因割堯典慎徽以下爲舜  
典當時馬鄭傳古文尙書二典皆合爲一篇名堯典  
不名舜典歷引羣書以證之頤煊案周禮春官序官  
注鄭司農云堯典曰帝曰咨四岳有能典朕三禮僉



曰伯夷詩時邁鄭箋書曰歲二月東巡守至於岱宗  
柴望秩於山川徧於羣神正義書曰以下堯典文公  
羊十四年疏引堯典曰在璿璣玉衡太平御覽卷八  
百四引此句亦作堯典亦皆馬鄭王本二典合爲一  
篇之證

金作贖刑

金作贖刑正義古贖罪皆用銅漢始改用黃金少其  
斤兩令與銅相敵故鄭玄駁異義言贖死罪千鍰鍰  
六兩大半兩爲四百一十六斤十兩大半兩銅與今  
贖死罪金三斤爲價相依附頤煊案漢書律歷志二  
十四銖爲兩十六兩爲斤千鍰通分之爲六千六百

六十六兩大半兩再分之爲十六萬銖以漢錢法五銖除之爲錢三萬二千漢黃金一斤直錢萬三斤直錢三萬以二千爲工耗故云千鍰爲銅四百一十六斤十兩大半兩與金三斤價相敵

食哉惟時

咨十有二牧曰食哉惟時柔遠能邇惇德允元而難任人蠻夷率服史記五帝本紀作命十二牧論帝德行厚德遠佞人則蠻夷率服頤煊案爾雅釋詁食僞也僞古通作爲字爲哉猶言勉哉時是也惟是柔遠能邇是論帝德行惇德允元而難任人是厚德遠佞人與太史公所采古文合

朕虞

汝作朕虞正義鄭玄云言朕虞重鳥獸草木漢書王莽自稱爲予立予虞之官則莽謂此官名爲朕虞頤煊案史記五帝本紀於是以益爲朕虞是以朕虞爲官名後漢書明帝紀永平三年秋八月戊辰改大樂爲大予樂亦同此義

鮮食

益稷暨益奏庶鮮食又云暨稷播奏庶艱食鮮食頤煊案史記夏本紀一云令益予衆庶稻可種卑濕命后稷予衆庶難得之食食少調有餘以均諸侯一云與益予衆庶稻鮮食與稷予衆庶難得之食食少調

有餘補不足徙居太史公以艱食爲稻食故兩引皆  
出稻字上文旣言稻食下文不必重言故以鮮食爲  
食少屬下句讀皆古文尙書說

### 赤埴墳

禹貢厥土赤埴墳釋文埴甫力反鄭作𡵓徐鄭王皆  
讀曰𡵓顧烜案太平御覽卷三十七引尙書曰徐州  
土𡵓墳謝沈注𡵓音志謝所注卽鄭本𡵓當與𡵓字  
通用儀禮鄉射禮鄭注古文𡵓爲𡵓今文或作埴說  
文埴黏上也義亦與𡵓相近

### 江沱潛漢

浮於江沱潛漢釋文江沱潛漢四水名本或作潛於

漢非正義浮此四水乃得至洛本或潛下有于誤耳  
頤煊案史記夏本紀作浮於江沱洿於漢爾雅釋水  
漢爲潛亦當有于字

二百里蔡

二百里蔡傳蔡法也正義蔡之爲法無正訓也頤煊  
案此與下文二百里流對言之皆謂流放之地左氏  
昭元年傳周公殺管叔而蔡蔡叔杜預注蔡放也說  
文作𦵏注𦵏𦵏散之也散亦是放義鄭注蔡之言殺  
殺卽𦵏字

輔予一人

湯誓爾尙輔予一人史記殷本紀作爾尙及予一人

頤煊案爾雅釋詁及與也公羊隱元年傳及者何與也左氏宣七年傳凡師出與謀曰及皆與輔義相近其如台

盤庚上卜稽曰其如台傳則當卜稽於龜以從曰其如我所行頤煊案此台字不訓爲我其如台者猶言其奈何也湯誓今汝其曰夏罪其如台史記殷本紀作女其曰有罪其奈何高宗彤日乃曰其如台殷本紀作乃曰其奈何西伯戡黎今王其如台殷本紀作今王其奈何皆其證

罔有逸言

罔有逸言民用丕變傳無有逸豫之言民用大變從

化頤煊案罔有逸言謂無有失言說文逸失也廣雅  
釋詁逸失也逸通作佚下文惟子一人有佚罰傳佚  
失也

不浮

盤庚中鮮以不浮於天時傳浮行也少以不行於天  
時者言皆行天時頤煊案禮記聘義孚尹旁達鄭注  
孚讀爲浮此浮當讀爲孚孚信也言君無不承安民  
而恤之民亦安君之政相與憂少以不信於天時故  
無凶災

泰誓三篇

泰誓頤煊案今文泰誓三篇太史公采以入史記周

本紀九年武王上祭于畢至乃還師歸是上篇之辭  
若二年聞紂昏亂至孳孳無怠是中篇之辭武王乃  
作太誓告於衆庶至不可再不可三是下篇之辭然  
則泰誓上篇爲觀兵時事中篇爲伐紂以告諸侯下  
篇以告衆庶齊太公世家師尚父左杖黃鉞至與太  
公作太誓亦上篇文也左氏襄三十一年傳杜預注  
今尙書大誓亦無此文正義今尙書大誓謂漢魏諸  
儒馬融鄭玄王肅等所注者也是馬鄭王所注古文  
尙書本有泰誓三篇其書至唐猶存故泰誓正義云  
上篇觀兵時事中下二篇亦伐紂時事藝文類聚卷  
十六引泰誓作尙書曰卽是馬鄭王本至宋以後馬



鄭王尙書注亡此泰誓三篇亦從而亡矣

陰騭

洪範惟天陰騭下民傳騭定也天不言而默定下民  
頤煊案呂氏春秋君守篇鴻範曰惟天陰騭下民陰  
之者所以發之也高誘注陰陽升陟也言天覆生下  
民助天舉發明之以仁義也爾雅釋詁騭陞也此正  
高注所本陰騭又通作陰德史記田完世家行陰德  
於民淮南人間訓夫有陰德者必有陽報新序雜事  
篇吾聞有陰德者天報以福說文德升也其音義並  
同

一五行蔡邕石經五行上無一二次第等字頤煊案  
史記宋微子世家引亦無之周禮大宰鄭注引五福  
一曰壽無九字漢書食貨志引八政一曰食無三字  
谷永傳引皇極皇建其有極無五字說文卜部引卜  
疑無七字後漢書李賢注文選李善注初學記藝文  
類類太平御覽引皆無一二次第等字

戚我先王

金滕未可以戚我先王傳戚近也周公言未可以死  
近我先王相順之辭正義死則神與先王相近故言  
近先王頤煊案此說非也周公嫌穆卜禮畧故云未  
可以近我先王因爲三壇同墀乃告大王王季文王

是慎重其禮也

自以爲功

公乃自以爲功頤煊案功通作攻字周禮大祝掌六  
祈以同鬼神示五日攻六日說鄭注攻說則以辭責  
之攻卽下文冊祝之辭下乃得周公所自以爲功代  
武王之說卽得此冊祝之辭史記魯周公世家作乃  
自以爲質質亦辭也

大誥譌字

大誥予不敢閉于天降威用寧王遺我大寶龜頤煊  
案漢書翟義傳作予豈敢自比於前人乎天降威明  
用寧帝室遺我居攝寶龜閉當作瑟于當作平寧王

上屬用字讀又云日子復反鄙我周邦傳作是天反  
復右我漢國也鄙古通作否字否右字形相近東晉  
本改作鄙

歷人

梓材肆往姦宄殺人歷人有傳又當詳察姦宄之人  
及殺人賊所過歷之人有所寬宥頤煊案爾雅釋言  
辟歷也大戴禮子張問入官篇歷者獄之所由生也  
歷人亦謂犯法之人

讎民

召誥予小臣敢以王之讎民百君子傳敢以王之匹  
民百君子治民者非一人言民在下自上匹之頤煊

案釋文讎字或作酬古通作疇字疇民謂同等之民  
卽所謂齊民

旁作穆穆

洛誥旁作穆穆迓衡傳四方旁來爲敬敬之道以迎  
太平之政頤煊案旁當作方儀禮士喪禮牢中旁寸  
鄭注今文旁爲方義典方鳩僇工說文引作旁述古  
字旁方通用方作穆穆迓衡言公方爲穆穆之敬以  
迎太平與益稷方施象刑惟明文義相類新序節士  
篇引作旁施象刑維明傳皆訓爲四方非是

卑服

無逸文王卑服卽康功田功傳文王節儉卑其衣服

以就其安人之功以就田功頤煊案卑服謂文王卑處西土在藩服之時

訓德

立政謀面用丕訓德傳謀所面見之事無疑則能用大順德頤煊案訓德卽俊德堯典克明俊德史記五帝本紀作能明馴德集解徐廣曰馴古訓字索隱史記馴字徐廣皆讀曰訓訓順也

鄭不見周官篇

周官頤煊案鄭注古文尙書無此篇周禮小宰鄭注前此者成王作周官其志有述天授位之義故周公設官分職以法之掌次鄭注王之孤三人副三公論

道者鄭志趙商問成王周官立太師太傅太保茲惟三公是周官散文之見於他書者非此篇文

率循大卞

顧命率循大卞傳率羣臣循大法正義卞之爲法無正訓頤煊案山井鼎攷文作帥修大辨帥古率字修循字相似說文采辨別也讀若辨又云采古文辨辨有法義是東晉本作率循大采正義本譌作卞

無蓋

呂刑鰥寡無蓋傳鰥寡得所無有掩蓋頤煊案無蓋猶言無害也爾雅釋言蓋裂也釋文舍人本作害蓋害古同聲通用字

商賚

費誓我商賚爾傳我則商度汝功賜與汝頤煊案商  
常是賞字之譌甘誓用命賞于祖商說文作賁與賞  
字形相近東晉本改作商



讀書叢錄卷二

臨海洪頤煊

力政

周書度訓解力爭則力政力政則無讓頤煊案政讀  
爲征周禮均人掌均地政鄭注政讀爲征閭胥凡春  
秋祭祀役政喪紀之數鄭注杜子春讀政爲征史記  
天官書天子微諸侯力政集解徐廣曰一作征

衆非和不衆

衆非和不衆孔晁注和之以懷衆頤煊案不衆二字  
文義不相承以上下文例之衆當作聚言衆非和則  
不能聚也因字形相近而譌依注義亦當作聚字

終之以古

常訓解始之以古終之以古孔注言政必敬始慎終  
頤煊案當作始之以古終之以今故下文云行古志  
今政之至也政維今法維古皆今古對言之

樹惠不瘥

文酌解樹惠不瘥孔注瘥巔也以爲己巔也頤煊案  
瘥當是瘥字之譌方言瘥審也郭璞注瘥埋又翳左  
氏僖二年傳入自顛軫水經河水注引作顛軫穆天  
子傳郭璞注引作寘軫說文寘塞也樹惠不瘥謂無  
所翳塞

旁隧外權

大明武解旁隧外權頤煊案隧卽攻城穴土之法權  
謂烽火史記封禪書通權火集解張晏曰權火烽火  
也狀如井挈皐也其法類稱故謂之權

宗讒

程典解商王用宗讒震怒無疆孔注宗衆疆境也頤  
煊案宗是崇字之譌史記殷本紀九侯女不憚淫紂  
怒殺之而醢九侯鄂侯爭之疆并脯鄂侯西伯昌聞  
之竊歎崇侯虎知之以告紂紂囚西伯美里此卽指  
其事所謂震怒無疆也孔注誤

枳

小開解德枳維大人大人枳維公公枳維卿卿枳維

大夫大夫枳維士頤煊案枳卽枝字爾雅釋地中有  
枳首蛇焉釋文引孫炎云蛇有枝首枳枝古字通用  
德枳維大人大人枳維公言大人爲德之枝公爲大  
人之枝詩文王本枝百世蕩枝葉未有害本實先撥  
正是此義後漢書馮衍傳李賢注引此數句云言上  
下相維遞爲藩蔽也義亦作枝

移潔干清

寶典解移潔干清孔注實少而名多曰移也頤煊案  
移卽侈字考工記鳧氏侈弇之所由興鄭注故書侈  
作移儀禮少牢饋食禮主婦侈袂周禮追師鄭注引  
作移袂移侈古字通用

三巫

克殷解乃命南宮百達史佚遷九鼎三巫孔注三巫地名頤嬭案三巫若是地名九鼎下當有于字史記周本紀作命南宮括史佚展九鼎保玉保通作宝巫與玉字形相近三巫疑卽宝玉之譌

合詳

文政解合詳毀成孔注合詳無德而信也頤嬭案詳審也事審則當斷之於心合衆審以爲審則反致疑以敗成卽詩所謂如彼築室于道謀是用不潰于成孔注非

赤宜未定

度邑解四方赤宜未定我于西土史記周本紀作日夜勞來我西土集解徐廣曰一云冑來頤煊案日夜四方字形相近赤是亦字之譌勞來當依集解作冑來宜未卽冑來之譌

居陽無固

自洛汭延于伊汭居陽無固史記周本紀作居易無固頤煊案集解徐廣曰夏居河南初居陽城後居陽翟字本作陽索隱言自洛汭及伊汭其地平易無險固字譌作易尙書禹貢涇屬渭汭傳水北曰汭穀梁傳二十八年傳水北爲陽居陽卽指二汭而言陽古文作易與易相近因譌

驕用逐禽

皇門解譬若畋犬驕用逐禽其猶不克有獲孔注驕謂不習也言是人之無得猶驕犬逐禽不能獲頤煊案驕是畋犬之名詩駟鐵載獫狁驕毛傳獫狁驕田犬也長喙曰獫短喙曰猓驕言用驕犬以逐禽其尙不能有獲喻用賢臣尙不能利於家國況是讒賊媚嫉之人

陰羽

王會解璉上張赤帟陰羽孔注陰鶴也以羽飾帳也頤煊案陰讀爲翳山海經海外西經夏后啓左手操翳郭璞注翳羽葆幢也爾雅釋言蠹翳也翳羽謂以

羽爲竿首如羽葆幢之屬陰翳聲義皆相近

納

於越納頤煊案說文鰓魚似鼈無甲有尾無足口在腹下从魚納聲

蜀人以文翰

蜀人以文翰文翰者若臯雞頤煊案說文引逸周書作文翰若翬雉爾雅釋鳥雉類伊洛而南素質五彩皆備成章曰翬翬雉與文翰義合郭璞爾雅注引逸周書作文翰若彩雞其本已失今又作臯雞孔注臯雞似鳬冀州謂之澤特孔本似作澤雉後譌作臯雞臯澤古字通用見左傳釋文



質沙

史記解昔者質沙三卿朝而無禮君怒而久拘之譁而弗加諸卿謀變質沙以亡頤煊案質沙卽風沙風說文作𠂔穆天子傳玲瓏郭璞注音鈴瓏質古文作𠂔與風古文𠂔字形相近

反而復之

太子晉解若能幪予反而復之孔注幪覆也度謀還與否也頤煊案依注義反當是度字之譌上文言請歸聲就復與田故云謀還與否也度謀爾雅釋詁文

毛詩

毛詩正義毛字漢世加之六藝論云河間獻王好學

其博士毛公善說詩獻王號之曰毛詩是獻王始加  
毛也頤煊案史記漢書引詩皆稱詩曰不稱毛詩說  
文自序其傳詩毛氏注中引詩亦皆稱詩曰無毛字  
唯漢書藝文志毛詩二十九卷毛詩故訓傳三十卷  
此卽河間獻王所加之本

我姑酌彼金罍

卷耳我姑酌彼金罍毛傳姑且也釋文姑如字說文  
作𠂔音同云秦以市買多得爲𠂔頤煊案依說文姑  
當作沽與論語鄉黨沽酒同義史記律書姑洗左氏  
定四年傳史記正義引白虎通皆作沽洗沽姑古字  
通用

維鳩方之

鵲巢維鳩方之毛傳方有之也頤煊案方並也荀子  
致士篇莫不明通方起楊倞注方起並起淮南汜論  
訓乃爲窬木方版高誘注方並也爾雅釋水大夫方  
舟李巡曰併兩船曰方舟併亦並也

蔽芾

甘棠蔽芾甘棠毛傳蔽芾小貌頤煊案爾雅釋言芾  
小也傳以蔽芾爲小貌雖本於爾雅但與詩義不合  
詩以芾釋蔽言其樹蔭之大故可以止於其下以聽  
訟張遷碑蔽沛棠樹沛大也韓詩作蔽芾甘棠生民  
芾厥豐草芾亦是大義小雅蔽芾其樛樛大木也鄭

箋釋之蔽芾始生殆亦徂於雅訓而失之

裯

小星抱衾與裯毛傳裯禪被也鄭箋裯牀帳也正義  
鄭既以衾爲被不宜復云禪被也漢世名帳爲裯蓋  
因於古故以爲牀帳顧煊案爾雅釋訓幬謂之帳郭  
璞注今江東亦謂帳爲幬裯幬同聲字故鄭據以易  
傳邢昺爾雅疏引鄭箋云幬牀帳也文選神女賦李  
善注引毛詩箋曰幬牀帳也後人據箋以改字如此  
類甚多

願言則嚏

終風願言則嚏毛傳嚏眙也鄭箋嚏讀當爲不敢嚏

咳之噍頤煊案經文本作寔故毛訓爲跽鄭作噍者  
改其義未改其字釋文寔本又作寔可證也今本作  
噍是後人據鄭箋改之釋文劫也本又作跽崔云毛  
訓寔爲劫今俗人云欠欠坎坎是也不作劫字正義  
王肅云願以母道往加之則噍劫不能行跽與劫音  
義同則作劫者王肅本也崔靈恩集注本作寔坎也  
釋文本從之寔寔劫坎皆因字形相近而譌

### 契闊

擊鼓死生契闊與子成說毛傳契闊勤苦也頤煊案  
契刻也讀如契臂爲盟之契闊遠也言以死生相約  
爲久遠之辭釋文韓詩云約束也亦是此義

北門

北門出自北門毛傳北門背明鄉陰鄭箋云喻已仕  
於闇君猶行而出北門頤煊案北門紂城北門詩譜  
自紂城而北謂之邶邶在紂城以北故仕邶者必出  
自北門

中葦

牆有茨中葦之言毛傳中葦內葦也頤煊案韓非子  
內儲說燕人李季好遠出其妻私有通於士季突至  
士在內中漢書淮南王傳王陽怒太子閉使與妃同  
內終不近妃霍光傳皆拜卧內卽臥室也易繫辭男  
女構精正義構合也言男女陰陽相感任其自然得

一之性故合其精則萬物化生也草蟲亦既觀止鄭箋既觀謂已昏也引易曰男女觀精爲證並字異而義同

不屑髦也

君子偕老不屑髦也毛傳屑絜也頤煊案周禮絜壺氏鄭注絜讀如絜髮之絜絜與結同義鄭箋不絜者不用髮爲善言婦人髮美不用結他髮以爲髻一切經音義卷十三引字林髻絜髮也鄭箋善當卽髻字之譌正義言其髮美長不用髮而自絜美也失之

泮坡也

氓隰則有泮毛傳泮坡也釋文坡本或作陂澤陂詩

傳云障也本或作破字未詳觀王述意似作破頤煊  
案當作泮破也匏有苦葉迨冰未泮毛傳泮散也破  
散義相近淇則有岸以爲之防隰則有破散之時言  
變易無常若是坡字與厓岸同義箋不必云泮讀爲  
泮矣

大叔于田

大叔于田釋文叔于田本或作大叔于田者誤頤煊  
案此詩三章凡十言叔不應此一句獨言大叔毛傳  
叔之從公田也足證毛本無大字序欲以別於上篇  
故加大字後人據序以增經非也

抑



抑磬控忌抑縱送忌正義抑者此叔能磬騁馬矣又能控止馬矣抑者此叔能縱矢以射禽矣又能縱送以逐禽矣頤煊案抑者美也猗嗟抑若揚兮毛傳抑美色國語楚語於是乎作懿戒韋昭注懿讀曰抑爾雅釋詁懿美也下章抑釋棚忌抑鬯弓忌義同

零露漙兮

野有蔓草零露漙兮釋文漙本亦作團頤煊案匡謬正俗詩古本有水旁作專者亦有單作專者後人輒改之爲團字讀爲團圓之團山井鼎考文本藝文類聚卷八十一文選江淹雜體詩李善注引詩皆作團

維莠騫騫

甫田維莠驕驕頤煊案下章維莠桀桀毛傳桀桀猶  
驕驕也傳箋俱不釋驕驕之義揚子法言脩身篇田  
甫田者莠喬喬爾雅釋詁喬高也文選射雉賦何調  
翰之喬桀義卽本此

舞則選兮

猗嗟舞則選兮毛傳選齊鄭箋選者謂於倫等最上  
頤煊案選讀如選懦之選謂柔弱也舞取柔弱爾雅  
釋訓婆娑舞也郭璞注舞者之容賓之初筵屢舞僊  
僊屢舞傲傲屢舞嗒嗒皆取柔弱爲容

弗曳弗婁

山有樞子有衣裳弗曳弗婁毛傳婁亦曳也正義曳

者衣裳在身行必曳之婁與曳連則同爲一事頤煊  
案公羊昭二十五年傳牛馬維婁何休注繫馬曰維  
繫牛曰婁則婁者繫也釋文婁馬云牽也玉篇手部  
引詩作弗曳弗樓孟子告子下踰東家牆而樓其處  
子趙歧注樓牽也

### 奉時辰牡

駟鐵奉時辰牡毛傳時是辰時也冬獻狼夏獻麋春  
秋獻鹿豕羣獸頤煊案辰當是麋字之省吉日其祁  
孔有鄭箋祁當作麋麋牝麋也中原之野甚有之爾  
雅釋獸麋牡麋牝麋此不言牝而言牡者是通言其  
類也吉日毛傳祁大也與此下文辰牡孔碩義正相

合

夏屋渠渠

權輿於我乎夏屋渠渠鄭箋渠渠猶勤勤也頤煊案正義崔駰七依說宮室之美云夏屋渠渠荀子脩身篇有法而無志其義則渠渠然楊倞注渠讀爲遽文選魯靈光殿賦揭遽遽而騰湊李善注遽遽高也遽遽卽渠渠也

可以樂飢

衡門泌之洋洋可以樂飢釋文樂本又作藥沈云舊本皆作樂字晚詩本有作𡵓下樂臧氏鏞堂曰鄭作藥飢不云樂當爲藥是經本作藥也正義引王肅孫

毓皆云可以樂道忘飢是傳中樂道忘飢之言非毛氏本文乃肅所私撰頤煊案經本作樂晚詩本作樂是後人據鄭箋改也隸釋繁陽令楊君碑徘徊樂志蔡邕焦君贊衡門之下栖遲偃息泌之洋洋樂以忘食義皆本於此詩臧說非是

### 歌以詛之

墓門歌以詛之釋文詛又作許頤煊案說文詛問也从𠂔言聲許讓也从言卒聲音義本別今經典常相亂者淳化帖東晉康帝書陸女郎問詛草書作許與許字形相似因譌

### 于貉

七月一之日于貉取彼狐狸爲公子裘毛傳于貉謂取狐狸皮也鄭箋于貉往搏貉以自爲裘也狐狸以共尊者顧煊案傳意不以于貉爲狐貉之貉與箋異義皇矣貉其德音釋文貉本又作貉貉古通作陌字言往陌取彼狐狸皮以爲公子裘也

予手拮据

鴟鵂予手拮据毛傳拮据擻搨也正義說文云擻持擻搨謂以手爪搨持草顧煊案今本說文無擻字搨字注戟持也据字注戟搨也戟聲近拮搨聲近据通之則可單言戟左氏哀二十五年傳褚師出公戟其手杜預注抵徙手屈肘如戟形斯于如矢斯棘鄭箋

輶也如人挾弓矢戟其肘是也亦可單言据史記  
呂后本紀見物如蒼犬據高后掖據卽据也漢書五  
行志據作據師古曰據謂揭持之其義同也

駢駢征夫

皇皇者華駢駢征夫毛傳駢駢衆多之貌頤煊案楚  
辭招魂往來僉僉王逸注僉僉行聲也詩云僉僉征  
夫廣韻九臻注引詩亦作僉僉說文僉行貌

常棣核

常棣常棣之華毛傳常棣棣也釋文云本或作常棣  
核頤煊案王應麟詩考引韓詩序夫移燕兄弟閔管  
蔡之失道藝文類聚卷八十三引詩云夫移之華萼

不煒煒則作常棣核是

鄂不

鄂不韡韡毛傳鄂猶鄂鄂然言外發也韡韡光明也  
鄭箋不當作拊拊鄂足也正義王述之曰不韡韡言  
韡韡也頤煊案說文茅華盛从艸不聲卽此不字

烝也無戎

烝也無戎毛傳烝填也釋文烝之承反填依字音田  
與寘同又依古聲音塵塵久也故箋申之云古聲填  
塵同頤煊案爾雅釋詁烝衆也言良朋雖衆無相助  
已者

坎坎



伐木坎坎鼓我鄭箋爲我擊鼓坎坎然頤煊案說文引詩作鞀鞀鼓我段氏玉裁說文本鞀久又以章牟聲孫恂牟下江切靈臺鼗鼓逢逢呂氏春秋季夏紀高誘注一切經音義卷六引詩皆作鼗鼓鼗鼗鼗卽鞀字之省邨風擊鼓其鏜毛傳鏜然擊鼓聲也正義司馬法曰擊鼓不過聞鏜聞皆與牟聲相近

### 樂只

南山有臺樂只君子鄭箋只之言是也頤煊案左氏襄十一年傳引詩曰樂旨君子殷天子之邦杜預注謂諸侯有樂美之德二十四年傳引詩云樂旨君子邦家之基杜注言君子樂美其道說文旨美也

遐不

遐不眉壽鄭箋遐遠也遠不眉壽者言其近眉壽也  
頤煊案棧樸遐不作人毛傳遐遠也遠不作人也遐  
不猶言不遐下武不遐有佐思齊烈假不遐遐又通  
作瑕泉水不瑕有害狼跋德音不瑕其音義並同

助我舉柴

車攻助我舉柴毛傳柴積也鄭箋舉積禽也頤煊案  
說文云棼積也外手此聲詩曰助我舉棼文選西京  
賦收禽舉棼薛綜注棼死禽獸將腐之名也李善注  
棼聚肉名不論腐敗也聚肉卽積也漢書婁敬傳師  
古曰棼讀曰瘠易說卦乾爲瘠馬釋文京荀作柴柴

𦵏字義通也

夜未艾

庭燎夜未艾毛傳艾久也鄭箋艾末日艾以言夜先  
雞鳴時頤煊案左氏昭元年傳國未艾也杜預注艾  
絕也絕亦盡也夜未艾謂夜漏未盡時

維周之氏

節南山維周之氏鄭箋氏當作桎鐇之桎釋文桎之  
實反又丁履反礙也本有作手旁至者誤也阮尙書  
校勘記段玉裁云當是抵字誤桎是也別體字抵作  
桎與桎字形近頤煊案桎當是屋字之譌說文屋礙  
止也从广至聲屋底字形相近與釋文義合卽今俗

室礙字

填寡

小宛哀我填寡毛傳填盡釋文韓詩作疹頤煊案填是瘕之借字雲漢胡寧瘕我以旱鄭箋瘕病也釋文韓詩作疹疹通作殄周禮稻人夏以水殄草鄭注殄病也

蛇蛇碩言

巧言蛇蛇碩言出自口矣毛傳蛇蛇淺意也正義蛇蛇然淺意之大言頤煊案蛇蛇美也爾雅釋訓委委佗佗美也太平御覽卷六百九十引詩作委委蛇蛇古字通用蛇蛇大言猶莊子齊物論大言炎炎簡文

注炎炎美盛貌蓋反譏之之辭

既往既來

大東既往既來使我心疚鄭箋言譚人自虛竭餽送而往周人則空盡受之曾無反幣復禮之惠是使我心傷病也頤煊案既來當作既求謂我以禮往求糴於彼而彼不我恤是使我心疚也求疚韻合來求字形相近

廢大也

四月廢爲殘賊毛傳廢伏也釋文又一本作廢大也此是王肅義正義定本廢訓爲大頤煊案當從定本作廢大也毛傳本於爾雅爾雅釋詁廢大也列子楊

朱篇廢虐之主張湛注廢大也列女傳引詩廢爲殘  
賊言怙於惡是三家詩義鄭箋言大於惡宋本可證  
俗本改作怙於惡非是

伊寡婦之利

大田伊寡婦之利鄭箋聽矜寡取之以爲利頤煊案  
寡婦猶言小民兄曰寡兄妻曰寡妻國君曰寡人皆  
寡小之辭不言民言婦者承上文以其婦子饁彼南  
畝而言言婦而子在其中

室人入又

賓之初筵室人入又鄭箋又復也賓手挹酒室人復  
酌爲加爵頤煊案此與下文矧敢多又又卽侑字勸

也儀禮有司徹乃議侑於賓鄭注古文侑皆作宥禮記王制王三又鄭注又當作宥又侑宥古字通用

### 維師尙父

大明維師尙父毛傳師大師也尙父可尙可父史記齊太公世家集解駟案劉向別錄曰師之尙之父之故曰師尙父父亦男子之美號也頤煊案齊世家太公望呂尙譙周曰姓姜名牙尙當是太公之字宣和博古圖周淮父卣銘穆從師淮父又云對揚師淮父休淮亦是字

### 廼宣廼畝

綿廼宣廼畝鄭箋時耕曰宣頤煊案此節是初定其

疆界尙未及耕宣謂宣通其溝防重水利也畝謂定其一夫受田之制

不長夏以革

皇矣不長夏以革毛傳革更也不以長大有所更鄭箋夏諸夏也不長諸夏以變更王法頤煊案禮記鄉飲酒義夏之言假也釋名釋天篇夏假也寬假萬物使生長也尙書大傳夏者假也革亟也不長夏以革謂非明德之君不長假以天命而亟更之

徒歌曰嘏

行葦或歌或嘏釋文毛云徒歌曰嘏爾雅云徒擊鼓謂之嘏徒歌謂之謠頤煊案毛公釋詩亦不盡依爾



雅徒歌曰𣦵毛或別有所受今本傳作徒擊鼓曰𣦵  
是正義從王肅本改

何以舟之

公劉何以舟之維玉及瑤鞞琫容刀毛傳舟帶也鄭  
箋民亦愛公劉之如是故進玉瑤容刀之佩頤煊案  
周禮司尊彝皆有舟鄭注鄭司農云舟尊下臺若今  
時承槃何以舟之謂何以奉槃進之故鄭箋卽訓舟  
爲進也

包休

蕩女包休于中國毛傳包休猶彭亨也鄭箋包休自  
矜氣健之貌頤煊案易大有釋文引干注彭亨驕滿

貌文選魏都賦咆然雲徹劉淵林注咆然猶咆哮也  
自矜健之貌詩云咆然於中國魚作咆與毛詩異

倉兄塤兮

桑柔倉兄塤兮毛傳倉喪也兄滋也塤久也鄭箋喪  
亡之道滋久長正義倉之爲喪其義未聞顧烜案釋  
文兄本亦作況倉兄猶言倉皇也尙書無逸則皇自  
敬德正義王肅本皇作況無皇曰漢石經皇作兄古  
字本通用塤當作癘病也言勿遽而至於病所以不  
絕心憂也

來旬

江漢來旬來宣鄭箋旬當作營正義旬之與營字相

類頤煊案正月憂心惻惻釋文惻本又作熒周禮均人鄭注旬讀如營營原隰之營是皆其字相類之證

彼徂矣

天作彼徂矣岐有夷之行後漢書西南夷傳引韓詩作彼徂者岐有夷之行頤煊案鄭箋後之往者又以歧邦之君有佼易之道正義徂謂新往者正義釋彼作矣爲作矣彼徂矣爲往者箋疏本皆當作者字

不吳

絲衣不吳不敖釋文吳舊如字說文作吳吳大言也何承天云吳字誤當作吳从口下大故魚之大口者名吳胡化反頤煊案史記封禪書引此詩作吳孝武

本紀引此詩作虞虞吳古字通用說文吳一曰大言也从矢口在矢部大部無吳字一切經音義卷十一鏝此古文奇字鐸吳字不必作吳而有華音故毛傳卽以譁訓之

龍和也

酌我龍受之毛傳龍和也鄭箋龍寵也正義龍之爲和其訓未聞寵字以龍爲聲故龍爲寵也顧煊案說文龔从共龍聲龔古通作恭字恭有和義故毛傳以龍爲和也

駟駟牡馬

駟駟牡馬釋文牡本或作牧顧煊案正義本作牧馬

顏氏家訓書證篇詩云駟駟牡馬江南書皆作牝牡  
之牡河北本悉爲放牧之牧藝文類聚卷九十三太  
平御覽卷九百五十八文選李陵荅蘇武書李善注  
引作牧皆河北本

白馬黑鬣曰駟

有駟有駟毛傳白馬黑鬣曰駟釋文韓詩及字林云  
白馬黑鬣也正義定本集注鬣字皆作鬣頤煊案淮  
南時則訓乘白駟高誘注白馬黑毛曰駟毛卽鬣字  
釋文引樊孫爾雅並作白馬黑鬣鬣尾也亦當作鬣  
字

歲其有

有馭自今以始歲其有君子有穀詒孫子釋文歲其有本或作歲其有矣又作歲其有年者矣皆衍字也阮尙書校勘記正義本未有明文頤煊案毛傳歲其有豐年也此以豐年釋年字正義春秋書有年者謂五穀大熟豐有之年故知其有年謂從今以去當有豐年也定本集注皆云歲其有年正義本有年字

居常與許

閔宮居常與許毛傳常許魯南鄙西鄙頤煊案管子小匡篇桓公曰吾欲南伐何主管子對曰以魯爲主反其侵地常潛國語魯語作棠潛左氏隱五年公觀魚於棠棠卽常也常在魯南故毛傳訓爲南鄙

景貞維河

玄鳥景貞維河鄭箋河之言何也顧煊案隸釋逢盛  
碑無可奈河吳仲山碑疆尔慙痛奈河隋龍藏寺碑  
以何人爲河人河何古字本通用